

四庫全書

集部

欽定四庫全書

集部

吳郡文粹續集卷二十三
四

詳校官庶吉士臣朱理

侍讀臣孫球覆勘

總校官進士臣繆琪

校對官主簿臣汪日贊

謄錄監生臣曹夢齡

欽定四庫全書

吳都文粹續集卷二十三

明 錢穀 撰

山水

五湖賦

此賦出藝文類聚工下有餘文重其古也錄之

楊泉

乃天地之玄源陰陽之所徂上值箕斗之精與雲漢乎
同模受三方之濯既為百川之巨都居揚州之大澤苞
吳越之具區南與長江分體東與巨海合流太陰之所
覬玄靈之所遊追湖水而往還通蓬萊與瀛洲爾乃詳

觀其廣深之所極延袤之規方邈乎浩浩漫乎洋洋西
合乎濛汜東苞乎扶桑日月於是出入與天漢乎相望
左有包山連以醴瀆峯巒崔嵬穹窿紆曲右有平原廣
澤蔓延旁薄原隰陂阪各有條格茹蘆葦亂隱軫肴錯
衡風之所去零雨之所薄

初學記收楊泉五湖賦

作西晉楊泉與前
文不同復錄之

余觀夫主五湖而察其雲物皇哉大矣以為名山大澤
必有記頌之章故梁山有夾夾之詩雲夢有子虛之賦

夫具區者揚州之澤數也有大禹之遺跡疏川導流之功而獨闢然未有翰墨之美余竊憤焉敢忘不才述而賦之其辭曰濬矣大哉於此五湖乃天地之玄源陰陽之所徂上屬斗牛之精與雲漢乎同模受三方之灌溉為百川之巨都居揚州之大澤包吳越之具區南與長江分體東與巨海合流太陰之所必玄靈之所遊追潮水而往還通蓬萊與瀛洲

五湖記

王鏊

吳郡之西南有巨浸馬廣三萬六千頃中有山七十二

襟帶三州

蘇湖常也

東南諸水皆歸焉其最大者二一自寧

國建康等處入溧陽迤邐至長塘湖并潤州金壇延陵

丹陽諸水會於宜興以入

今寧國建康之水不由此矣

一自宣歙天

目諸山下杭之臨安餘杭湖之安吉武康長興以入而

皆由吳江分流以入海一名震澤書所謂震澤底定是

也一名具區周禮職方氏其澤藪曰具區山海經浮玉

之山北望具區是也一名笠澤左傳越伐吳吳子禦之

笠澤是也一名五湖范蠡乘舟出五湖口太史公登姑蘇望五湖是也五湖者張勃吳錄云周行五百里故名虞仲翔云太湖東通華亭松江南通烏程霅溪西通義興荆溪北通晉陵馮湖東連嘉興韭溪水凡五道故謂之五湖陸魯望云太湖上稟咸池五車之氣故一水五名然今湖中亦自有五湖曰菱湖莫湖游湖貢湖胥湖莫釐之東周三十餘里曰菱湖其西北周五十里曰莫湖長山之東周五十里曰游湖泆無錫老岍周一百九

十里曰貢湖胥山之西南周六十里曰胥湖五湖之外
又有三小湖夫椒山東曰梅梁湖杜圻之西魚查之東
曰金鼎湖林屋之東曰東皋里湖而吳人稱謂則惟曰
太湖云

自蠓山東望震澤

鮑照

瀾漫潭洞波合沓崿嶂雲漲島遠不測崗澗近難分幽
篴愁暮見思鳥傷夕聞以此藉沉疴棲迹別人羣結言
非盡書有念豈敷文

泊震澤口二首

薛據

日落草木陰舟徒泊江汜蒼茫萬象開合杳聞風水洄
公值漁翁竄窳逢樵子雲開天宇靜空明照萬里早雁
湖上來晨鐘海邊起

獨坐嗟遠遊登岼望長洲寥落星欲盡曠曠氣漸收行
藏空自秉知識仍未周伍胥既伏劍范蠡亦乘流歌竟
鼓枻去三江多客愁

泛五湖效謝惠連

李紳

范子蛭冠履扁舟逸霄漢嗟予抱險艱怵惕經瀰漫窮
通汎濫勞趣適殊昏旦浴日盪層空浮天森無畔依灘
落葉聚立浦驚鴻散浪疊雪峰連山孤翠厓斷風帆向
巨壑雲矗成高岼宇宙或東西星辰沉粲爛霞生瀕洞
遠月吐青熒亂豈復問津迷休為呂梁嘆漂沈身詎保
覆溺心長判吳越郡異鄉嬰童及為翫依稀古井邑嘹
唳同鷺鶴舉棹未宵分維舟方日旰徵斯濟川力若鼓
凌風翰易狎當悔游臨深罔知難

太湖秋夕

王昌齡

水宿烟雨寒，洞庭霜落微。
月明移舟去，夜靜夢魂歸。
暗覺海風度，蕭蕭聞雁飛。

泛太湖書事寄元微之

白居易

烟渚雲帆處處通，飄然舟似入虛空。
玉杯淺酌巡初匝，金管徐吹曲未終。
黃夾纈林寒有葉，碧琉璃水靜無風。
避旗飛鷺翩翩白，驚鼓跳魚撥刺紅。
澗雪壓多松偃蹇，岩泉滴久石玲瓏。
書為故事留湖上，

所見勝景多記
在湖中石上吟

作新詩寄浙東軍府威容從道盛江山氣色定知同報
君一事君應羨五宿澄波皓月中

早發赴洞庭舟中作

闔閭曙色欲蒼蒼星月高低宿水光棹舉影搖燈燭動
舟移聲曳管弦長漸看海樹紅生日遙見包山白帶霜
出郭已行十五里唯消一曲慢霓裳

宿湖中

水天向晚碧沉沉樹影霞光重疊深浸月冷波千頃練

飽霜新橘萬枝金幸無案牘何妨醉縱有笙歌不廢吟
十隻畫船何處宿洞庭山脚太湖心

夜泛陽隄入明月灣寄崔湖州

湖山處處好淹留最愛東灣北隄頭揜映橘林千點火
澄泓潭水一盆油龍頭畫舸銜明月鵲脚紅旗蘸碧流
為報茶山崔太守與君各是一家游

泛太湖

方干

長天接廣澤二氣共含秋舉目無平地何心戀直釣孤

鐘鳴大岬片月落中流却憶鴟夷子當時此泛舟

湖中曲

李商隱

閭門日中吳歌遠陂路綠菱香滿浦後溪暗起鯉魚風
船旂閃斷芙蓉榦傾身奉君畏身輕雙橈兩槳尊酒清
莫因風雨罷團扇此曲斷腸惟此聲低樓小徑城南道
猶自金鞍對芳艸

除夜寄羅同年

王禹偁

郡僚方賀正獨宿太湖稜塔下羞為吏船中祇載僧折

梅和薄雪煮茗對孤燈應笑排衙早寒靴踏曉冰

舟泊太湖

羅處約

三萬六千頃湖侵海內田逢山方得地見月始知天
南國吞將盡東溟勢欲連何當洒為雨無處不豐年

過太湖

范仲淹

有浪即山高無風還練靜秋宵誰與期月華三萬頃

其二

平湖萬頃碧謝客一開顏待得臨清夜徘徊載月還

舟泊太湖

楊傑

區區朝市逐紛華不信湖心有海槎
八十丈虹寒卧影一千頃玉碧無瑕
古今風月歸詩客多少尊鱸屬酒家
安得扁舟如范蠡烟波深處卜生涯

同前

李顥

旋經義興境頓棹石蘭渚震澤竟何
在今惟太湖浦圓徑縈五百盼目眇
無覩高天森若岼長津襟如縷窈窕
尋彎碕迢遞望島嶼驚飈揚飛湍浮
霄漾懸岨輕禽翔

雲漢游鱗憩中許黯靄天將陰峽岩舟航舞馮河安可
徇靜觀戒行旅

太湖阻雨

孫覲

白首對瀧吏駢顏媿逐臣溪山不改色風雨解留人輒
軻知天意漂浮住此身紛紛小兒女何必淚沾巾

大霧中自胥口渡太湖

范成大

白霧漫空白浪深舟如竹葉信浮沉科頭晏起吾何敢
自有山川印此心

再渡太湖

囊風閣雨半晴陰慘淡誰知造化心
委命浮沉惟一葉計身輕重亦千金
紅塵猶道不勝險白浪莫嗔如許深
晚得鄉山堪繫纜卧聽鼉吼與龍吟

太湖辭

趙孟頫

儂住東湖震澤洲烟波日日釣魚舟
山似翠酒如油醉眼看山得自由

渺渺烟波一葉舟西風木落五湖秋
盟鷗鷺傲王侯管

甚鱸魚不上鉤

雲海亭望具區

姜夔

茫茫復茫茫中有山蒼蒼大哉夫差國坐占天一方夫
差醉蓮宮巨浪搖不醒越兵從何來奪我玉萬頃年年
亭上秋一笛千古愁誰能知往事飛下雙白鷗

過太湖

唐桂芳

向晚推蓬望羣山隱約青篙工排陣勢野飯襟魚腥水
濶疑無地天低剩有星吳音相爾汝聊復慰飄零

同前

許謙

周迴萬水入遠近數州環南極疑無地西浮直際山三
江歸海表一徑界河間白浪秋風急漁舟意尚閒

同前

張雨

漾滟魚龍戲僻側鳬雁宿併吞三萬頃寧不為小曲唯
應鷓鴣夷子曾泊西山麓

冬夜震澤風雪異常

晴暖不可恃一夕冬令變屢忘和煦恩惟曰祈寒怨老

屋雪沒隙廣澤風肆便反覆鼓洪濤揚簸塞荒塹隱然
洞庭樂勇甚闔閭戰萬物芻狗如埋沒加蹂踐凌晨往
嚴馭野日復葱蒨仁哉天地心觀斯復可見

過太湖

李沔

衆水東南會三江左右通夫差中習戰范蠡此休功鷗
鳥青銅鏡魚龍熬目宮扁舟嗟未遂蕭散愧漁翁

同前

程煜

擊楫中流去西風客思催地吞南極盡波撼北溟迴蛟

館懸秋月龍宮起夜雷濯纓人不見長嘯倒金壘

同前

朱德潤

扁舟去何所渺渺太湖陰依依桑梓村拍拍枕寒潯飛
雲入遐睇鳥道橫青岑篙師戒勿渡柔櫓力不任我身
雖骨立未宜折壯心放船當中流浩歌激清音何當披
宮錦再作峨眉吟

同前

楊基

天帝何年遣六丁鑿開混沌見雙青湖通南北澄水鑑

山斷東西列畫屏
拚雨龍歸霄漢暝
網魚船過水雲腥
乘風欲渡終吾老
角里先生在洞庭

同前

徐賁

遙天散曉華
疎星歛微采
鳥聲出林繁
木葉過露改
荒村幾家成
平波衆流匯
鳴夷渺無踪
空煩艤舟待

同前

高啓

長溪如白虹
分走荆雪派
具區納羣流
襟帶三郡界
太虛混鴻濛
元氣流沆瀣
初疑溟渤寬
稍覺雲夢隘
茫茫

雁飛遲颭颭帆度快雨來鼉報鳴風起鷗鷺邁神龍作
淵都豈復數鱗介珠光照水府不受白日曬朝看砲車
雲雪浪動澎湃聲吹地將浮勢擊山欲壞黃頭雖輕生
捩柂不敢懈有時湛明鏡峰吐青幾塊烟中樹若莎波
上舟如芥漁就沙岬炊客來水祠拜震澤思禹功夫椒
記吳敗白魚逢夏出黃柑待秋賣我性好遊觀夙負雲水
債欲尋鷗夷舸不顧涉險戒人生亦何爲世故自拘械萬
事風飄花百年露垂薤何當扣林屋秉炬訪仙怪試探

不死方為人起疴瘵

月夜遊太湖

欲尋林屋隱還過洞庭遊
遠水初涵夜長天盡作秋湖
如青草濶月似白蓮浮
萬壑風傳笛三更斗挂舟
葉應隨鳥散山欲趁波流
浩蕩吾何適鷗夷不可求

舟過太湖

張羽

具區涵空濶一葦凌風度
烟花亂晴天浪色生寒霧
遙山含碧氛青蒲冒孤渚
解帶俯清流開襟散塵慮
乍聞

商婦歌或見漁航聚微茫姑蘇城綠縵洞庭樹緬思底
定功疏鑿有遺處懷安諒非賢臨深豈無懼且當趣歸
棹沿洄難久住

震澤

具區維南澤洪瀦莫吳會并包潢汙聚涵育魚龍大崩
浪撼坤樞水氣積陰晦蒼茫神靈遇極目光炯碎中有
兩洞庭秀色迴相對峭立根虛無接影浸淡瀨飛鳥去
何窮長垣亘天外風波多險阻舟檣易傾壞緬思懷襄

初洪濤渺無界賴茲神禹功底定永無害吳越何區區
向此角成敗賢哉鵠夷翁臨風發長慨

遊太湖

徐有貞

遊賞那分雨共晴從教水宿與山行畫船載酒過林屋
翠幰衝花入化城半夜放歌驚鶴夢三秋浪迹逐鷗盟
閒居每續龜蒙賦醉後時吹子晉笙萬里歸來聊獨樂
五湖占斷有誰爭老天於我非無意明月隨人似有情
索靖也知憂世事謝安雖起媿蒼生癡翁自笑癡猶在

欲為皇家致太平

題太湖

施槃

木喬山秀草惟天西距姑蘇百里遙
水汎具區留禹迹地連南越見胥潮
霜林橘熟黃金顆石洞人吹碧玉簫
疊巘層厓堪厯覽白雲飛處是夫椒

雨中過太湖望洞庭

吳寬

孤蓬遙蹕太湖心着雨高山水墨深
積氣上蒸炊已熟弱流西注壓將沉
不因迢遞辭清賞轉覺空濛助醉吟

詩裏白公誇月夜未知奇觀屬春陰

歸省過太湖

王鏊

十年塵土面一洗向清流山與人相見天將水共浮落霞漁浦晚斜日橘林秋信美仍吾土如何不少留

遊湖

游徧南湖與北湖畫船隨處宿菰蒲青深著雨山如染綠淨無風水似鋪玉帶蟒衣爭快覩鳳笙龍管醉相扶輕橈又轉東湖去何似當年范蠡圖

再游南湖

漾舟出深港舟人問安之我行無定在信彼天風吹東
西與南北遠近齊所宜連朝風雨顛晴明喜今茲鳴笳
發湖口蘭橈蕩輕漪紅鱗撥刺驚鷗鷺相與飛扣舷激
吳歌續彼滄浪詞風雲忽變色前山雨將來勸君速回
棹無為逮淹嵒

丁丑八月二十日與弟姪輩泛太湖石蛇山舟
發微雨後雨大作抵銷夏灣蔡九達舍明日連

雨游興索然乘便風還家則日出皎然矣為之
一笑賦詩紀之

載酒張帆信所如青山含雨轉模糊
虵丘咫尺翻成遠
夏渚逍遙可作娛世事無端還自笑
秋陰有象若為圖
始知白傅真堪羨五宿澄波皓月湖

自胥口入太湖

徐禎卿

洪波終古汎冥茫襟繞羣山地軸長
水脈潤資南國遠
仙家深構玉堂涼沙邊過雨龍腥暗
帆下分殮客鱸香

許把一筇隨一杖不將崑閬羨虛皇

奉和徵明過太湖

浮光滉滉漾瑤空神浸千年說禹功
寒漲平烟吞越分
虛濤入夜撼蛟宮遙汀嚶嚶悲秋雁
落日微微颺網風
堪笑吳兒心似鐵輕舟衝逆駕扁蓬

與徐太史入太湖

胡纘宗

十載襟期震澤遊蓬萊仙子忽聯舟
龍從水抱兩山石
縹緲雲連三郡樓輕帆時傍溪橋出
明月空隨星漢流

七十二峰乘浪起
淡烟疎雨帶漁謳

泊太湖呈座主守谿公

潭潭相府洞庭隈
渺渺晴窓馬跡堆
常日談經鶴駕至
及時束帛龍函來
一尊獨俯五湖坐
半榻斜依百瀆開
東閣門牆趨侍地
紉薇猶見燭三台

太湖六首

茫茫四郡塵躡外
渺渺五湖烟霧中
若更無山天地溷
縱云有石水雲空
澄潭日出漁帆集
遙浦潮平賈棹通

為謝東莊王相國金庭玉柱屬三公

楚有洞庭江與滙吳有洞庭海欲連水心樓觀疑無地
渡口溪橋別是天子夜月波寒浸玉秋空藥杵淨春烟
翩然鶴夢驚初覺七十二峰何處仙

仙壇窈窕微茫外春水瀾漫混沌中亂石巉岩猶齧浪
羣山縹緲欲浮空沉沉玉洞千年隔皎皎銀河一派通
玄鶴月明堪載笛扣舷何處覓蘇公

傍海月生潮不至緣江路隔水還連

太平有頃

兩山雲出東

西樹五夜星搖上下天洞口鱗鱗千頃玉水心晶晶萬
家烟鳥喧花發壺觴亂太守頽然醉若仙

即看鶴駕盤湖上擬有仙曹集洞中日月隔橋生碧海
星河當戶動遙空天圍春樹千村合山漏秋濤十郡通
獨放扁舟載王敕白雲深處問三公

天外洞庭遙隔絕日邊鍾阜近勾連翩翩鳳馭三千地
嫋嫋鸞簫十二天春漲繞湖山漱石秋晴合浦水圍烟
百篇斗酒誰能述空憶當時李謫仙

胡太守孝思奉詔存問過太湖有作次其韻四

首

王鏊

東南巨浸茫無外吳越交爭向此中
漠漠雁飛愁欲墮
冥冥帆遠若乘空
樓臺倒影星河動
花木交陰島嶼通
倘沐皇恩分一曲
他年請爵太湖公

林屋峰前受一廬
渚昆汀鷺住相連久
塵殿閣三台地
歸占東南一洞天
詔下屢沾新雨露
林間還與舊雲烟
自從白傅來游後
直到君侯兩似仙

太湖三萬六千頃七十二峰烟雨
中萬壑奔流秋野濶
孤松倒挂寒潭空恍疑靈境與
凡隔豈謂人寰有路通
畫船五宿湖波裏千古風流始
屬公

洞庭東西雙玉峙物外地脈相
勾連雨後人耕隴上陌
月明犬吠洞中天紅蒸遠岫上
朝日暝入孤村生暮烟
漁郎再到忽迷路錯比桃源道
是仙

入太湖諭祭溪翁相國

胡纘宗

烟雲淼淼水冥冥七十二峯何
處青東山日出魚龍浴

西崦風迴松桂馨一代君臣崇舊典兩朝勲業注新銘
鑾坡供奉空蓮炬細看三台夜夜星

胥口

范成大

扁舟拍浪信西東何處孤帆萬里風一雨快晴雲放樹
兩山中斷水粘空

再渡胥口

古來此地快蓬心天繞明湖日照臨一雁雲平時隱見
兩山波動對浮沉衰髯都共荻花老醉面不如楓葉深

留戶釣徒來問訊去年盟在宵重尋

發胥口達包山

蔡羽

秋水連空鳬鷺長滄洲菰米飯初香地寬不辨帆來影
雲起遙疑石上房青壁常含芝草秀朱苞新染橘林霜
年年佩劍嗟游子莫笑南山豆盡荒

旦發胥口經湖中三首

王寵

瀛壖委蕓藪地險隘山川渾沌自太古決滂開吳天仰
飲咸池津俯濯東南偏龍宮揭瑰麗蛟室閟幽玄孕化

晨陽吐涵虛宵象懸洪流既滿沛列嶂亦迴延雲標海上闕石秀鏡中蓮開冬暍肅氣落木浩無邊黃鵠有奇翼八表恣周還倘遇浮丘公歛忽蓬萊巔

其二

夙有丘壑尚緬懷鸞鶴踪揚帆忽天矯赤水驂虬龍五湖瀉杯掌三州盪雲胸金屏匝地軸玉鏡開天容扶則四瀆亞浸維百谷宗丹丘駐日月瑤州連春冬絳氣恣縈薄青霞何複重仙人蛻化處千載容芙蓉吐哉委腐

鼠絕頂巢雲松

其三

遊子戀清暉舟師謔高浪水宿濟前湍蓐食凌窮嶂雲
帆詫多奇霞石非一狀龍性已難馴鷗機彌浩蕩靈妃
曳翠旗川后褰綃帳蒼茫天外殊瀕洞風濤壯安流神
禹功長嘯鵠夷放昔人已推顏宇宙空俯仰感往不復
悲追來胡弗暢縱轡萬壑巔振衣三島上彼美戰勝賢
薜蘿遙在望

泊胥口太湖月下作

胡纘宗

一年此夜月如畫萬里茲行榻似桴雲湧樓船天上坐
樹圍簫鼓鏡中浮兩山的的河初挂百瀆盈盈星欲流
况有玉堂徐學士一尊長嘯洞庭秋

晚登木瀆小樓

范成大

萬象當樓黼黻張闌干一士立蒼茫雲堆不動山深碧
星出無多月淡黃宿鳥盡時猶數點歸鴻驚處又斜行
松陵正有鱸魚上安得長竿坐釣航

舟次木瀆聞庶子學士入山不得相見賦詩寄之

陳基

布帆西望疾如飛，影逐高雲入翠微。
欲與赤松俱隱去，却騎黃鶴幾時歸。
烟霞夢寐無深淺，塵世功名有是非。
白首君恩俱未報，可容終采碧山薇。

過木瀆

吳寬

舟行三十里，初向瀆川過。
客路偏逢雨，人家盡枕河。
橋橫光福嶺，水接洞庭波。
倏爾嗟春及，田間見荷蓑。

水瀆在胥口之東九里香水溪在焉

上沙夜泛

范成大

困倚船窓看斗斜起來風露滿天涯
亭亭宿鷺明菰葉閃閃涼螢入稻花
月下片雲應夜雨山根炬火忽人家
江湖處處無窮景半世紅塵老歲華

上沙

水邊犬吠隔疎林籬落蕭森日半陰
繁杏鎖紅春意淺晚梅飄粉暮雲深

上沙遇雨快涼

刮地風來健葛衣一涼便覺暑光低雲頭龍掛如垂筋
雨在中峰白塔西

上沙田舍

更無雲物起微陰隴畝人家各好音歲晚陽和歸稻把
夜來霜力到楓林兒童笑裏豐年面烏鳥聲中落日心
釀秫炊秔都入手賸拚腰腳辦登臨

上沙捨舟登陸

村北村南打稻聲竹輿隨處款柴荆斜陽倒影天如醉
明日山行更好晴

香水溪分派遶出西山而東為上沙水

晚渡白洋灣

王鏊

扁舟深夜尚孤征兀坐篷窓看月明兩岬秋蟲互相應
不知端復為誰鳴

白洋灣亦太湖支流東出吳山之南

石湖賦

莫旦

鱸鄉子歸自天上休於林下戶有清風門無俗駕卧白
雲於空山聽天籟於秋夜時維春暮琴書餘暇乃拉客
爲石湖之遊聊以樂昇平之化於是乎乘畫舫挂輕帆
開芳尊具盤飧往來乎綠楊芳艸之地夷猶乎碧浪清
波之灣陋泛舟之訪雪鄙攜妓之遊山酒半顧謂客曰
水之瀦而爲湖者世固不少湖之著名於世者人亦共
曉如彭蠡洞庭震澤青草非不萬頃茫茫千里浩浩然
蹈之者身危望之者膽掉不若是湖也規模雖小而有

遊觀之美氣候雖微而有人物之秀叶觀其一水所匯
兩界中分北之半為吳邑南之半為松陵西擁橫山東
望吳門溶溶漾漾渺渺汙汙入夜則月華而星彩當晝
則鏡明而練紋列屏嶂於羣岫開圖畫於諸村九夏之
林巒擁翠三春之花柳爭妍叶風月富萬家之臺榭帆
檣渺千里之烟雲滌葉蘋花之遂性浴鷗飛鷺之相親
采蓮人歎乃於遠近劬書子晤伊於旦昏佞神微福者
貴賤接踵攜朋玩景者節序相仍肩輿遊騎之不絕朝

鐘暮鼓之相聞水際度漁歌兮牧笛谷口依樵擔兮耕

犁

叶

春醉街頭何處勝遊公子晚粧樓上誰家倦繡佳

人此其大畧也若夫溪山之美景物之勝則上方轟轟
兮臺殿重疊茶磨盤盤兮草木蔥蒨宴宮仙人二里兮
秀接楞伽丹霞桃花二塢兮青連吳嶺紅蓼渚兮紕微
村觀音岩兮吳王井治平寶積兮二寺相角姑蘇拜郊
兮兩臺未泯行春越城二橋之雄偉御書綺川二亭之
深靜魚城兮酒城及涇兮彭涇越來溪兮未湮越王城

兮半崩李墅新郭兮人多龍斷范村莫舍兮家有科名
其物則田有嘉穀林有美木水有禽魚原有雁鷺芍藥
如楊海棠似菽范村壽櫟綺川壽撲磬口之梅佛頂之
菊傷荷藕兮梅花萼呂公茭兮桃枝竹可以適口而充
腸可以悅心而娛目其人則夫差之霸吳壽夢之分封
抱越仇而思報乃於此而卧薪叶雪檣李之前恥會黃
池而爭雄可謂能慷慨以立謀隱忍而成功者也夫何
狙會稽之得意謂桐夢其佳卜許敵人之行成受美姝

與神木起姑蘇之高臺乃荒淫而縱欲外伯嚭兮舌如
簧內西施兮顏似玉朝絃兮夕管燕歌兮楚曲使國祚
兮陵夷忍吾民之魚肉太子友徒借螳螂以為喻伍子
胥空指麋鹿以忠告抑孰知嘗膽之決於復讐猶疽囊
之終於潰毒是以蘇臺之歌舞方殷而越溪之兵戈已
逼叶亟起視其四封茂一夫之持稍嗟乎悲夫可為痛
哭於是援舊恩以祈哀竟伏劍而瞑目何昔日之雄飛
而今時之雌伏使仲雍之祀中絕而泰伯之風可忸蓋

吉凶由人自召非天為之禍福且也覽遺迹而懷古可
殷監而警俗自是以來寥寥千載悵人物之已非惟湖
山之長在有宋隆興人才挺生則有文正范公一代人
英銜命帝闕氣壓邊庭二府柄用誠哉股肱文章功業
輝輝汗青所以光孝兩朝代有科名厯官郡邑循良有聲
括田令下權要縱橫公獨違詔烈哉忠貞所以理宗制
詞有仁人之褒至今為湖上之美稱然而丁謂何人亦
來經營雖有真宗之詩難逃五鬼之評回視二公不啻

井鳩之俛神鳳鼠糞之汙太羹者也惜哉天眷聖朝明
良際會則有都司徒之功業許冢宰之聲譽朱訓導之
文章吳同知之詩句莫侍郎與陳知府之勲名盛居密
與張南村之高致至於吾師順菴以卓行而諡貞孝吾
父由菴以進士而膺郡寄御醫盛公三朝寵遇之數公
者俱列鄉賢而祠百世者也其他科目聯翩簪纓煥燿
或奮身於鶚薦或筆札之擅妙皆石湖秀氣之所鍾難
以枚舉而相告客聞此言唯唯諾諾扣舷浩歌洗盞更

酌俄而蘋末風起西山日落皎皎天上嫦娥動人間之
鼓角舉百觴而共醉有不盡之餘樂嗚呼噫嘻人才之
生何代無之誦孟子然而無有之句則知是湖也豈無
如前數公之鳴於盛時者乎

遊石湖記

朱逢吉

姑蘇之西不一舍而近有石湖可千餘頃岸左右皆居
人襍植桃柳梅竹其下市水率蒲荷菱芡之屬中涵澄
波猶水鑑然沙鳥飛帆出沒往來無虛時具區橫其南

良田沃壤綿其東越來溪絡其北層巒疊嶽環其西背
具區行數十里至湖西而止峙為三峰盤旋如蓋由山
麓抵絕頂可三里晉支遁嘗棲其上唐因建梵宇曰楞
伽後立浮圖岌岌撐太虛若欲飛動前闢小殿列為神
像者五自前代時城內外暨村落百餘里間男女稚耄
當春夏月遠近各相率舟行載酒肴雜樂戲具徒行乘
馬驢竹兜以壺榼食器自隨或登岸以樂神日肩摩跡
接畢則宴遊以樂太平逮今如之今年正月余奉詔理

水是郡偕吳縣判簿濟陽江君率民循行田間築隄防
疏壅障遏奔激夙夜從事罔敢怠舟嘗過之未暇一登
覽二月既望行次湖上適以風波遂輟棹登岸君曰今
幸農事周水之泊田他鄉者已漸縮惟濱湖歛否莫覩
盍相與凭高覽之遂登峰之巔四顧其下田向所謂溺
者蒼翠覆阡陌井井乃矚吳西羣山如穹窿靈岩如天
平陽山薦福如獅子橫山黃山吳山小者離離如青鬟
螺髻高者列翠屏參差出烟樹杪湖波瑩然在足底殆

天啓畫圖信為遊樂之境餘所莫及抵暮寺主僧德啓
倒屣出翠微亭延觀雙冷泉掃榻以宿時治平僧清渭
先在坐焚香煮茗相與清話翌日下山復歷諸村墟若
木瀆若光福若橫金及過具區登包山督促成農功於
是堤之圯者整頽者立坎者夷水以車力入於湖溪田
野漸復故脩楔日舟過湖濱入治平精舍值僧渭松陰
中相與尚羊觀吳之列泉及深沙神池泉池所甃石已
撤毀所存潢潦一窪而已遂縱步登中第二峰披藁蕪

攝衣以上可三百武其顛方整若印故老相傳吳王夫
差嘗即此為祀天之所俗因呼拜郊臺外繚崇垣循湖
堤坡陀起伏如肯向有寶積寺居其麓今叢荆野蔓悉
莽為狐鼠之墟興廢不常無足慨者獨其北第三峰未
登翌日老僧淨日直其舍後薙荒穢取道叢篁曲折間
攀援而上殆數十尋峰頂狀如磨故名茶磨山當石竅
中出泉一泓不溢不涸甚清冽可愛峰之北下瞰湖尾
渚為蓮花陂山之環拱騰蛟翥鳳至湖以峙者奇秀萃

此止峰誠中冠治平寺獨當之峰左則枕湖有二橋聯
絡東曰越城西曰行春其傍有亭宇俯臨湖波乃即樵
徑崎嶇而下入面湖佛祠祠裂巨石鑿岩洞幽邃清絕
襟樹陰翳樛枝交其上岩下泉一池黝碧深百尺許魚
洋洋游其中飛石梁其上踰數仞過此而北岩中立石
斷大士像前為小軒尤奇因少憩俄見樹杪懸一蛇可
三四尺色蒼碧初疑為蔓童子以礫擲之輒昂首空中
騰及他枝而去老僧以為異云至亭下有刻石湖二字

字盈尺其兩間璽文一曰御書之寶小字三曰賜成大
且有表文乃知宋人范成大當孝宗朝為參政乞歸老
石湖故有是賜表即其上謝者按蘇州志載公以文學
政事著名其歸於斯園堂亭榭游樂之所非一湖因之
以稱今遺址漫不可攷獨湖北數里山曰天平文正公
祠猶存今四百年山林蓊蔚如故所置義莊子孫蒙其
澤未窮是知君子惟道德為永世之本山水未足云然
古明達士游覽所至必紀其見聞所以益智識今余老

而無學於格物致知之道不敢不勉故記永樂二年甲申春三月五日攜李芝山老樵朱逢吉記

御書石湖二大字跋

范成大

淳熙八年三月庚戌制書擢臣居守金陵閏六月丁亥朝行在所庚寅辭後殿翼日既望詔錫清燕苑中皇帝親御翰墨大書石湖二字以賜天縱聖能游藝超絕典則高古如伏羲畫體勢奇逸如神禹碑日光雲章垂耀縑素環列改觀禁籞動色臣驚定喜極不知扑蹈昧死

奉觴上千萬歲壽奉寶書以出越五日至石湖藏焉石湖者具區東匯自為一壑號稱佳山水臣少長釣游其間結茅種木久已成趣春秋時吳臺其陰越城其陽登臨訪古往迹具在汙萊露蔓千七百餘年莫有過而問者今猥以臣故徹聞高晴天光溥臨燕及荒野由開闢來未覩斯盛裴度李德裕皆唐宗臣綠野平泉亦聲震當代揆今所蒙無傳焉何物么臍獨冒寵赫百身萬殞莫能負載臣蒲柳早秋仕無補益縣官倘晚晚不休奸

止足之戒則將上累隆知俯媿初服臣用是懼冀幸少
日遂賜骸骨歸老湖上宿衛奎壁與山川之神暨猿鶴
松桂同在昭回中一介姓名亦因是不朽使後世知臣
屬厭榮祿得全於桑榆以無辱君賜則陛下丕顯休命
不委於草莽庶幾報恩之萬一臣既摩刻扁榜又被之
琬琰以傳且附著臣之自叙云

聖筆石湖大字歌

楊萬里

石湖仙人補天手整頓乾坤屈伸肘邇來化作嬾卧龍

咳唾珠璣漱瓊玖五雲萬里天九重玉皇深拱蓬萊宮
豈無九虎守閭闔北門半扉當朔風夜令雲師敕風伯
鞭起卧龍湖底月湖水捲上天中央却鎖北門護風雪
仙人御風乘綵雲玉宸殿上朝帝真帝將北斗酌天酒
水桃碧鵝脯麒麟傳呼玉蜍吸銀浦點霜調冰澆月兔
洒成羲畫河洛書白壁一雙浮雨露石湖二字天上歸
奎星壁宿落山扉昭回不飾吳苑艸姑蘇臺前近太微
詩人不直一杯水自是渠儂命如紙教人妬殺石湖仙

手攬星辰懷袖裏

又約鄰人至石湖

范成大

窈窕崎嶇學種園此生丘壑是前緣
隔離日上浮天水當戶山橫匝地烟
春入葑田蘆綻筍雨傾沙岼竹垂鞭
荒寒未辨招君醉且吸湖光當酒泉

與周子充侍郎同宿石湖

幽香馥蕙帳清夢安且吉
蘿月墮蒼茫松風隱蕭瑟
曉禽啄且鳴喚我起盥櫛鉤窓納雲濤
灑灑浴初日金鉦

忽騰上倒景落書帙佳晴有新課晒種催蓺林從今不
得閒東皋草過膝

壬辰三月十八日石湖花下

夜飲海棠月朝漱山茶露臞儒枯木形受用侈如許荆
扉隔黃塵誰識花島路惟有瘦筇枝共飲園中趣林神
釀餘春政爾美無度蕉蘂千萬重芳意未渠暮風香薦
秀色鼎俎謝腥腐雖無稻梁謀捫腹有餘飮

壬辰七月十六日侵晨石湖路中書事

白葛烏紗稱老農
溪南溪北水車風
稻頭的皦黏朝露
步入明珠翠網中

初歸石湖

曉霧朝暾紺碧烘
橫塘西岸越城東
行人半出稻花上
宿鷺孤明菱葉中
信脚自能知舊路
驚心時復認隣翁
當時手種斜橋柳
無限鳴蜩翠掃空

次韻蜀客西歸者來過石湖并寄成都舊僚

走遍埃塵倦鳥還
故鄉元在水雲間
黃梁飯裏夢魂醒

青簪笠前身世閒鷗鷺飛來俱玉立松篁歲晚各蒼顏
岷峨交舊如相問鐵鎖無扃任客攀

次韻同年楊使君同泛石湖舟中見贈

客舫中流下人家夾岸看洛花堆錦煖吳藕鏤冰寒莫
厭清歡暫須知後會難小詩煩本事任充彩毫端

曲誤不須顧客狂當好看日斜雙槳急風駛夾衣寒賸
說歸田樂休歌行路難石湖三萬頃何處覓憂端

北渚乘風渡西山帶霧看袖單嫌翠薄杯淺怯金寒宿

雨收全易春醒解却難且留行色住重肯過蘇端

乾道辛卯歲三月望夜與周子充內翰汎舟石
湖之間夜父歸宿農圃距今淳熙己亥九年矣
余先得歸田復以是夕泛湖有懷昔遊賦詩紀
事

石湖花下浮春空憶共仙人同短篷三年半醉吹笛去
棹入濕銀天鏡中鶴鳴喚歸斗未没却步扶疎花底月
不知行到碧桃邊但見天風吹積雪月圓月缺今幾回

依舊滿湖金碧堆仙人還上玉堂宿合有片時清夢來
一笑流光飛電抹嫦娥相對兩愁絕桂枝應亦老無花
蟾光不須疑鶴髮

晚歸石湖

何須車馬炫鄉關只作歸農老圃看夢裏曾腰青結佩
年來新着情游冠和烟種竹聊醫俗帶月聞蛙不在官
久矣此心恬不動如今併與此身安

午窓遣興家人謀過石湖

雲日初收破柱雷小窓坐穩興悠哉熏爐花氣朝醒解
茶鼎松風午夢回謝客門闌風動竹惜春時節雨肥梅
畫船破浪亦一快聞道湖光如醖醕

將至石湖道中書事

水綠鷗邊漲天青雁外晴柳堤隨草遠麥隴帶桑平白
道吳新郭蒼烟越故城稍聞雞犬鬧童僕想來迎

三月十六日石湖書事三首

春事日以闌暑陰正清美拖筇入林下秀綠照衣袂盧

橘梅子黃櫻桃桑椹紫荷依浪花顫笋破苔色起風日
收宿陰物色有新意隣曲知我歸爭來問何似病惱今
有無加飯日能幾掀髯謝父老衰雪已如此

種木二十年手開南野荒冉冉新歲月依舊林塘汙
萊擅下濕岑蔚驕衆芳麥母尚能瘦竹孫如許長憶初
學圃時刀笠冒風霜今茲百不堪裹帽人舞將龍鍾數
能來猶勝兩相忘

湖光明可鑑山色淨如沐閒心愜舊觀愁眼快奇矚依

然北窓下凝塵滿書簾訪我烏皮几拂我青氍毹荒然
賦遠遊幸甚遂初服老紅餞餘春衆綠自幽馥好風吹
晚晴斜照入疎竹兀坐胎息勻不覺清夢熟

石湖中秋二十韻十二年前嘗與工部兄及賓
客為此遊今有隔世者懷舊而作

野外行吾意城中寄却愁半秋三夜月千古五湖舟湧
地金芒發行天玉鏡流珠星沉不現銀漢黯如收高浪
連三境長風近十洲水天雙對影身世一浮漚迥白包

元氣空明慰病眸只憐心浩蕩不管髣飀放棹真狂
矣關門有此不四并非易事一笑亦難謀急管參漁笛
清歌間棹謳逢迎成邂逅嘯咏勸綢繆女擷蘋花獻妻
傾竹葉酬今宵如不飲何處可忘憂憶昔誰同賞於今
歲恰周陟岡睽魯衛伐木愴應劉獨嘆靈光在能追汗
漫遊大都緣未盡豈是病都瘳縱意褰蓬席輕生倚柁
樓節宣誠小爽猶勝賦悲秋

與游子明同過石湖

契濶相逢一笑懼當年森桂共駢鸞試談舊事醒村酒
仍起新晴煖客鞍梅粉都皴啼宿雨柳黃不禁展春寒
從今鼎鼎多幽事仍喜蛙聲不在官

次韻徐提舉游石湖三絕

三徑荒蕪岫幌開錦車何事肯徘徊春風想為高人住
落絮殘花好在哉

日脚烘晴已破烟山頭雲氣尚披綿却須多謝朝來雨
洗淨明湖鏡裏天

天上麒麟翰墨林當年手筆擅文心欲知萬頃波中意
但向三篇句裏尋

除夜自石湖歸苕溪三首

姜夔

細柳穿沙雪半消吳宮烟冷水迢迢梅花竹裏無人見
一夜吹香過石橋

笠澤茫茫雁影微玉峰重疊護雲衣長橋寂寞春寒夜
只有詩人一舸歸

桑間篝火却宜蠶風土相傳我未諳但得明年少行役

只裁白苧作春衫

遊石湖

鄭元祐

越來溪上水融融閒鷺鴦
夷棹底風暖霧黃消治平寺
燒痕青入館娃宮笙歌作樂
年年少魚鳥關情處處同
弔古從來易興感尚循華髮
繫孤蓬

陪陳敬初遊石湖

戴良

東髮企名都宦遊及茲年
遂陪登瀛客來上汎湖船
水光耀殘日林影溢中天
岩穴停橈見樓臺鼓枻看
蒼蒼

歛暝色暮暮曳寒烟菰浦有餘淒鷗鷺相與閒窈窕趨
迴浦蕩漾媚遙川水宿怯宵清蓬卧愛月穿俯視潛夜
魚仰睇衝曉鳶窘身懼浮霄歛迹慚躍淵何當謝冠履
歲晏此盤桓

石湖寫景

高文度

闔閭臺下越來溪處處西風颺酒旗翠壁丹梯開短軸
黃花紅葉入新詩鎔金霜蟹需高價蘸甲香醪輒滿卮
落日去程驢背穩短琴雙笈一童隨

與客攜樂遊寶積山汎石湖

高啓

雲山擁春郭，烟花漲晴川。
看花入山中，諸峯恣攀緣。
客吹玉管笙，合以金柱絃。
清音度碧嶂，松風助泠然。
宛若鸞鳳吟，要眇入紫烟。
行人盡矯首，謂遇雲中仙。
下山興未闌，相攜更登船。
虹收嶺外雨，鳥沒湖中天。
嵐翠破夕陽，樓閣影倒懸。
酒傾綠脂膩，鱸斫璫絲鮮。
獨恨無紅粧，清波照嬋娟。
微風吹帆緩，欲使歸途延。
衆賓起懽呼，舟仄水浸舷。
迴艫掠寺過，楊柳山門前。
此地有離宮，美人

艷當年羅裙罷春舞艸色餘芊綿況我惜此遊冠蓋十里連重來復誰在新知滿中筵人事竟若斯今古俱可憐能遊即稱達何須問愚賢我欲叫馮夷捧月出海邊醉後不歸去月照舟中眠

石湖與戴叔能懷雪坡大參

陳基

乘時登掃匪游盤故舊相攜盡楚冠兵革戰爭雖未息湖山陶寫有餘歡輞川賓客惟裴廸江左功名獨謝安想見鳳凰池上路秋風吹佩玉珊珊

石湖送別

王汝玉

青山嵯峨雲外起下有澄湖綿十里春風吹雨洗吳天
天淨湖明玉鏡圓范公昔日曾遊處水色山光帶烟樹
春明畫舫載笙歌獨有遊人自來去美人從此赴京師
湖上楊花正亂飛歌罷湖船前度曲珮聲歸去侍丹墀
至正戊子春季雨中張伯玉顧仲瑛同遊石湖
諸山宿寶積寺賦花游曲

楊維禎

三月十日春濛濛滿江花雨溼東風美人盈盈烟雨裏

唱徹湖烟與湖水，水天虹女忽當門。
午光穿漏，海霞裙。美人凌空躡飛步，步步上山頭。
小真墓，華陽老仙海上來，五湖吐納掌中杯。
石山枯禪開，若盃木鯨吼，罷催花板。老仙醉筆石闌西，
一片飛花，落粉題蓬萊宮中花報使。花信明朝二十四，
老仙更試蜀麻牋，寫盡春愁子夜篇。

和

顧憲輝

真娘墓下花溟濛，碧梢小鳥啼春風。
蘭舟搖搖落花裏，唱徹吳歌弄吳水。
十三女子楊柳門，青絲盤髻鬱金裙。

折花買眼一回步，蛺蝶雙飛上春墓。
老仙醉弄鐵笛來，瓊英起作迴風杯。
興酣鯨吸瑪瑙碗，立接鳴笳促象板。
午光小落行春西，碧桃花下題新題。
西家忽遣青鳥使，致書殷勤招再四。
當筵奪得鳳頭牋，大寫仙人蹋踞篇。
九月八日遊石湖，與祝大參劉廷美僉憲聯句。
待韓永熙都憲不至。

徐有貞

明日重陽今日遊，攬先來賞石湖秋。
青山有意邀詩棹，黃菊多情送酒籌。
烏帽任從風外落，緋袍不向坐中留。

同歸同老應難得莫把茱萸嘆白頭

次全諸公石湖聯句

韓雍

吳下衣冠集勝遊扁舟遊遍五湖秋未能執筆陪聯句
懶得逢人說運籌綠野文章傳在洛赤松心事棄封留
賡歌趣我歸來興莫道非才尚黑頭

石湖水阻聯句

王鏊

西首戀松楸扁舟乘曉發行行抵斯湖銓望望指巨缺

曾水塞長河流漸截輕筏鏊大塊噫餘威玄冥令仍烈

帆集比魚鱗岼安蛻龍骨銓人斷越城橋雁杳堯峰窟

鑿嵯峨峙玉山璀璨恍銀闕或碎若彫鏤銓或鈇如斧

鉞或垂如玉釵或挂若象笏鑿鼇足歌莫支鵬背負如

閑銓造煩魯遽工解倩師襄哲夏蟲語應疑鑿宵孤涉

還歇戒自履霜初銓藏豈凌陰節山腰助捨訝澤腹增

嶸嶸鑿上下眩坤乾東西混吳粵王祥鯉莫持銓孟宗

筭堪掘國忠信難倚靈均未須涸鑿進如狼跋胡行乃

車無軌舟子立招招銓行人意忽忽一葦未能航五丁

未渠伐

鑿

飛渡諒斯難來歸怪時吐况當陽生辰正值

春王月誰乘浮海桴

鑿

莫惜凌波韞行止豈偶然聊歌

記顛蹶

銓

石湖

茲地屢經行孤亭坐寥濶今來悚具瞻畫棟映轆轤久
聞玉川史新表石湖薛緬懷文穆公弗翦越城茂穹廬
受書爭勁氣凜莫奪岷峨開府議高深貌誰剗阜陵借
褒賁益國推挺拔天鏡閣澄泓玉雪坡達枿甫辭狼胡

寔尚說虎須拊因人地逾重懷古心尤渴歲事薦蘋蘩
登庸紹衣鉢鄉里重衣冠邦君事祖割君功已奏成我
冗敢辭撥方愁積潦深忽見陰霾豁天公如有待我興
其可閑舟借花邊維道屏松下喝未獲從駿奔猶幸瞻
履韜山僧具袈裟田笠襍緇緇展席俯清泠開園擷芳
辣野坐厠漁樵叢談參毳褐呦鹿杳不聞游儵滢堪掇
盟與沙鷗親吟兔山蟬聒陳跡俯顏垣流芳仰先達五
湖勝全貢三峽恐始脫帆影遠若凝波光澹如醖石梁

臥湖心浮圖見林末高歌和滄浪清夢渺黃閨倡酬忘
詮次今古籍囊括歸帆指西日天際雲一抹

舟過上方湖

桑悅

前輩高賢汎石湖許多好句落姑蘇傷哉兩度湖邊過
舊學荒來一字無

過石湖

徐源

湖山不改鬢成秋老興春深一放舟楊柳堤前黃鳥立
桃花洞口碧溪流峰巒逕客留青髻波浪驚人自白頭

萬里雲霄今杖屨祇將風月錦囊收

江神子

石湖避暑

楊循吉

船頭翹足卧湖風火雲紅有奇峯多少雲山都在醉眸
中萬頃清涼消不盡飛鳥度鏡光中蓮花開遍水晶
宮玉玲瓏錦香穠燦燦上方金碧聳虛空痛飲從來真
得計堪愛賞碧荷筒

泛石湖

皇甫信

橘綠柑紅秋暮天畫船雙槳石湖邊西風吹酒不知醉

落日微微鎖淡烟

諸友泛舟石湖還次治平

蔡羽

水氣連山靄晨遊夕未窮烟中懸磻暝天畔躡雲空
新月在潭底百花燃鏡中竹房禪榻穩處處愛山翁

遊石湖記

非高山不能驅吾神非深林不能沈吾思遊虎丘之一
日求石湖焉時少雨春盡漲未起舟梗於越來之溪客
刺木揭跣始獲登遵岸百步得茶磨之觀音岩間行憩

岩中為間從者至又百步得治平寺之竹林西起茶磨
東繞拜郊臺其山皆墻立其腹多怪木美箭望之蔚然
深黑治平之林樾也從郊臺東走環突奔聳為楞伽山
顛為楞伽寺有浮圖插雲中吳西南之鎮也竹林逮楞
伽不及五里峻甚多石客始輿負以升浮圖之前平展
百餘步有亭其上曰望湖之亭於是石湖徑其陽梅灣
出其背左引靈岩右帶吳淞不出十五里林巒疎秀水
風清潔生雲之山出泉之谷咸會亭下客始定飲於亭

而臨觀焉夫治平深林楞伽高山入其深搜玄鉤僻萬
化俱冥登其高心空目開萬象俱顯於一日之遊而兩
極其情四月竹脫節松生花草木濯茂玉膏出林與泉
俱香服之已暍而神生主人王履約讀書石湖蓋三年
矣用能抽其奇興以與客共暮不謀歸而忘其倦則茲
遊也王子之功蔡羽記

石湖秋汎同段戶部子辛文太史徵仲之作

王寵

漢洛類莊瓠汭依孔桴冥心委江海屏迹逃人徒鶴
厲申獨往蠖屈謝當途持此百年操居然山澤癯兩賢
顧同調枉楫臨家湖駢筵屬秋序嘯侶遘元夫初旭洩
雲翳落景鮮霞鋪重霖豁朗霽商氣集高梧南陵絢丹
碧北渚冒菰蒲瑤甍遞隱見羽節時有無陟峴禮精室
乘峰眺名郭神超體自逸世往迹與徂弔古指遊鹿歡
今懷過駒請君謝天伐畢慮收桑榆

雪後石湖與諸友同汎二首

共有丘中好而揚江上舫花潭水漾綠松嶺雪含青霽
色迴銀漢鮮雲卷畫屏子真歸舊谷為報北山靈

其二

多才自潦倒孰謂古人無雪照王恭筆雲開范蠡湖故
山饒酒伴修竹有行厨且逐林中鹿安能轅下駒

石湖作

勾吳山水秀西南雲白天青萬嶺含峭壁搏風時卷浪
平湖湧日恣成嵐金支翠節虛無見貝闕銀宮縹緲叅

潏潏乾坤祗自役
草堂長枕百花潭

石湖

石湖秀色那可奈
蛾眉埽鏡丹青開
飛浪九天蹴牛渚
落霞千里臨高臺
吳王醉卧不復曉
西施載去何時來
當杯未足轉愁夕
霜露沾衣鴻雁哀

石湖作

自得名川勝沿洄
殊未窮秋高千嶺出
地濶五湖空古堞
雲橫雉懸梁影卧
虹樓船催畫鼓野
寺落丹楓綺席

波光蕩紗窓霧氣通山人何惜晚歸路便樵風

湖上八絕句

石湖春色大可憐却似美人明鏡前
錦甸平鋪鴨綠水白雲飛動蔚藍天

星橋北挂瀉春流映出黃山水面浮霞石
天青飛練鵲桃花氣暖醉輕鷗

春山面面翠屏開盡繞吳王百尺臺
一代霸圖憐燼滅五湖流水恨東迴

越來溪上柳千絲畫鼓樓船晚更移一曲紫雲歌越女
雙鬟白雪舞吳兒

三月暮春春服成含風疊翠越羅輕生憎乳燕撩春色
轉遣飛花蕩酒情

數松磊落千尺強恰如天際羣龍翔吟風嘯雨聲瑟瑟
大澤深山藏棟梁

登山臨水春將歸獨樹桃花猶未飛玩世繁華真歛忽
後時顏色轉霏微

古木朱藤疎著花淡雲斜日淨江沙黃金臺上無推轂
白石山中有歲華

同王子美湖上看月二首

百尺星橋卧綵虹青天飛鏡水涵空憑君看盡人間月
誰似湖山枕簟中

酒榼茶鐺步步隨春江花月夜何其故人明日京華去
任說山公倒接羅

湖上逢曹子繩之

童子論交二十年舊遊零落已茫然石湖三月梨花雨
忽漫相逢野寺前

湖上

郡峰合沓錦屏圍樹色泉聲帶晚暉盡日拏舟無一事
平川十里看鷗飛

脩楔石湖作

有引

袞袞

嘉靖丁酉三月三日上也其日又為穀雨既欣令
節乃集良朋爰脩楔於石湖羨羲之之山陰希點也

之沂水不有賦咏何以述志陶情乎乃作此詩以倡
同游之士

大化陶天地令節屆春陽澄湖包廣臯翠嶺連崇岡嘉
條躍以嬉冥禽翮高翔微雲靄遠霄冷風吟脩篁雖無
絲與竹散懷藉壺觴神怡理自足心暢憂可忘既咏舞
雩什載奏山陰章悠然傲千古焉用游羲唐

同諸文學避暑石湖二首

理棹泛湖陰停橈占水心風簾煩暑隔水檻薄寒侵劇

飲方河朔良儔選竹林蓬壺何處是只向此中尋
彩鷁浮天上紅粧照鏡中歌翻金縷曲人住水晶宮
酊山公似清狂賀監同歸舟不惜晚為戀舞雩風

江寺副季春過飲橫塘莊遂同汎石湖

每逢北使問京華忽漫停驂野客家小飲花前張艸具
勝遊湖上附仙槎納涼宴坐迎風便聯句忘歸恨日斜
怪爾別來才思進江淹今已筆生花

石湖次彭孔加韻

秀嶺雲藏鳳
利澄湖月偃虹
梁風帆遠隨
落雁漁網高
挂斜陽

石湖送徐太史子升

胡纘宗

委佩乘雲入鳳池
綵毫染露立丹墀
仙桃春醉承顏久
御柳晨分退食遲
五色初裁天子詔
千秋還上侍臣詞
石湖風雨那為別
白雪陽春獨爾思

春日展墓還眺上方石湖

皇甫孝

松塋畢哀酹
返景陟田園
天溟悅虛漚
霄嶠麗嬋媛
霞

波影共爍鷗鳥自翩翩珠宮鬱翠微石磴靄雲門復竑
美春仲華日散皋原烟蘿搖絳瀑花竹引清源紛吾羈
宦客五載夢歸軒回首愧伊昔遊目暫遨魂弭節澹容
與平蕪落照繁誰能別此去空響北山猿

春日石湖

望入空氤樹影微山雲湖水競芳菲自隨春色桃源去
却笑秋風江上歸

石湖在白洋灣之北界吳縣吳江之間有茶磨諸峯

映帶頗為勝絕相傳范蠡從入五湖處初不甚顯得
文穆公而名始大著

吳都文粹續集卷二十三